

千頃齋初集

千頃齋初集卷之十六

汝南黃居中明立父著

文部

論

君子和而不同 乙酉鄉試墨卷

刻程

論曰 和同之介判於公私和同之公私判於情理君子任理不任情夫是以從公不從私也夫理非一己之私也合人心之公也理亦非一人之公也合天下萬世之公也合天下萬世之心

以成其公則謂之理合天下萬世之理以成其是則謂之和故所云和者豈必煦煦以徇物而後謂之和又豈必子子以絕物而後謂之和又豈必不徇人不徇己而後謂之和有意徇物和也而比有意絕物和也而矯不徇人不徇己和也而無主持統之所謂任情滅理縱私害公者也夫惟君子者以太虛爲眞宰以與物爲應迹求和心不求和迹計同理不計同俗合人與己之公而共成一是要於其理不可使易而已故

曰君子和而不同夫和同之辨幾微之間至難察矣故以可濟否謂之和好惡不殊謂之同夫酸鹹甘苦不同嘉味以濟謂之和羹宮商角徵不同中聲以諧謂之和樂是非可否不同中道以協謂之和德故易牙不能和同味之羹師曠不能和同音之樂君子不能和同是之謀何者同則不可以和而和則不至於同也是故有可無否非和而有否無可亦非和偏執夫是非可否非和而漫無所是非可否亦非和和者理也

同者情也任情者名相軋知相爭善否相非誕  
信相譏各從私便隨聲是非是之謂同而不可以言和任理者內不見已外不見人理之所是衆非獨是理之所非衆是獨非或拂人以從己或舍己以從人我與天下委曲以共成一是而均遊於至理之公是謂之和而不可以言同故有時而楚越一體靄蠹同視和也卽遺世獨立廻瀾砥柱亦不失爲貞介之和有時而明良合德臣主一心和也卽批鱗逆耳繩糾規誨亦不

失爲忠告之和俗有所當從純冕獵較不爲混  
世衆有所當違接浙去膳不爲潔身非其道則  
親暱有不猶如其道雖疎逖而不廢理在則庸  
夫芻蕘而可採理不在則先民往詰而不從論  
理不論迹則放丹瘠非忍兵巢牧非篡破斧斬  
非殘誅少正邪非戾論迹不論理則孤竹之清  
見爲忘世展禽之龢見爲徇俗有莘之五就見  
爲觀望久矣夫和同之間情理之判匪君子莫  
能察也君子知情爲理之外廓而理爲情之中

肩忘形骸去智故廉劖雕琢同於大通無將也無迎也而無不將也而無不迎也是故易知而難狎易從而難昵不矜名而好氣不隨俗而錯趾不立封畛亦不廢涇渭不昧權度亦不設城府其理之御乎情也若鑑之明而不先立妍媸權衡之審而不先立輕重規矩之正而不先立方員其情之出乎理也若物自妍媸而不罪鑑物自輕重而不罪權衡物自方員而不罪規矩夫是之謂能和夫是之謂和而不同彼參偶比

周之士與時浮沉人趨而趨人諾而諾毀名節  
而尚雷同棄廉隅而忍譏訕是謂徇人如梁子  
猶之可亦曰可否亦曰否和而比者也憤世嫉  
俗之士離蹤跋訾虛憣恃氣孤標以爲名異趣  
以爲高是謂徇已如東漢之顧厨俊及駢首就  
戮和而矯者也儇譎巧贗之士同流合污彼且  
爲無町畦亦與之爲無町畦彼且爲無崖亦與  
之爲無崖處於無是無非之間而甘瞑於無所  
異同之境是謂玩世如老氏之和光同塵鄉愿

之無非無刺和而無別者也夫和在理之是非  
不在情之同異在心之公私不在情之廣狹君  
子雖不同而胞與之意盍然流通不害其爲和  
小人操一同心先已分門戶立崖岸和又何從  
而生故論君子之和卽均爲君子而意見議論  
常有時而不同然彼無隱諱此無計較披鬲見  
素互相考質而適以明其爲君子論小人之同  
其甘如醴其膠如漆然而利害相傾慘於五兵  
聲名相激戕於百戰勢位相取利於機弩陰謀

險計每於同之中輒見焉是乃所以爲小人也甚哉和同之關世之治忽實懸於此嘗觀三五之世其君子師師濟濟協恭和衷而世臻郅隆治成熙皞晚近世人懷妬媢各是其所是非其所非以相薦擇狎主而不相下至如蜀黨洛黨一時號爲君子者亦棄和爲同互相標榜互相詆譖而不自覺則信乎習俗之累賢者不免也夫子之言倘亦有三五之思乎司世道者進君子之真和退小人之偽和天下可幾而理矣

上下同欲者勝

凡兵之勝非懾下以威而同下以欲欲之情不上隔下同上者也欲之權不下貸上同下者也顧有所獨擁則有所偏遺有所耑利於此則有所叢害於彼當其逞已恣欲豈不自爲媿快然一已之欲伸而天下之欲鬱矣下之欲不可久鬱鬱則凌囂詬諱駭然而起而瓦解土崩之禍應之故一人之威福不能獨行而上之欲亦鬱下鬱則散上鬱則孤以孤君馭散民霍焉離耳

而可耑欲以徇乎可使上肥而下獨瘠乎民生  
有欲惟無欲者能同之非無欲也以下之欲爲  
欲也同天下之欲以爲欲故用天下之用以爲  
用可驅而來可帥而往各得其所欲而上亦  
惡乎不得其欲哉惟無欲也故能成其欲善之  
乎孫子之論兵也曰上下同欲者勝夫勝者我  
與敵之所乘也我角之敵亦抗之我形之敵亦  
反之故兵之佐勝者多而所以必勝者寡絕山  
依水據阻阨塞蓄積足給士卒殷軫此軍之大

資也而勝亡焉有衆如熛有臣如虎乘廣林植  
鍪刃鋒憂此戰之助也而勝亡焉順招搖挾刑  
德向生背死左牡右牝三官不繆九章著明此  
有制之師也而勝亡焉何者此能爲勝而不能  
常爲必勝可勝在敵而常爲必勝在我我與下  
共敵者也令之而下不應作之而下不前君臣  
上下之間滑焉有離德我不勝下而外何以勝  
敵且兵死地也將死官也人出其父母懷衽之  
中生未嘗見寇而犯白刃蹈鑪炭斷死於前者

比比也夫斷死與斷生者不同非其父兄子弟  
必然不可解之親誰能出生入死去安存卽危  
亡而不悔有其欲之以爲利焉故也今天下含  
氣之倫踐石以上有不欲富欲貴者乎有不欲  
安欲榮欲逸欲壽欲爲子孫計者乎我欲之而  
能謂人已乎顧下之欲非上不遂而上之欲亦  
非下不因下致其力以供上之欲而上封其欲  
以拂下之願誰能堪之此其心皆原於有己已  
甚重人甚輕已甚急人甚緩已之欲甚足愛而

一物不可無人之欲甚無足愛可以惟吾意而  
莫之恤設以身爲人而視已則是已也亦人之  
所爲甚輕甚緩甚無足愛者也而誰其重之急  
之爭致其所甚愛利不可無之物惟吾意而無  
足爲吾難也則不同焉者之過也夫同焉欲富  
而上何忍乎下貧同焉欲貴而上何忍乎下賤  
同焉欲安而上何忍乎下危同焉欲榮而上何  
忍乎下辱同焉欲逸欲壽欲寵子孫而上何忍  
乎下之暴露顚頷賞功而不延於世死事而不

厚卹其家况下之望於上者止爵祿名寵而上  
之責於下者則勞苦死亡捐軀殉國下所重而  
甚難衣食分人上所輕而甚易下已償其二責  
而上乃失其三望彼實捨重而就難我則愛輕  
而愒易此雖嚴父不得之順子察兄不得之弱  
弟而况君民將卒之間哉辟之身然君心也將  
耳目也卒其肢體指拇也未有一身之中而關  
節脉理可以不通者又辟之家然君主也將亞  
旅也卒其臧獲僕御也未有一家之內而悲喜

媿拂可以不貴者故不以欲爲欲而公爲天下之欲又不以欲爲天下之欲而視爲一已之欲欲富者同以祿瓜衍之縣都殿之鄙可錫也欲貴者同以爵上將之尊通侯之重可毋愛也欲安榮者同以名寵璽書輅服可賜秬鬯彤弓可貺也欲逸欲壽欲寵子孫者同以苦樂休戚歌鐘女樂可分鬚可剪裘帽可解帶礪河山可盟三子可侯而十代可宥也而將於士卒亦施有而廢私同利而除怨冬不襲夏不扇雨不蓋與

士同寒暑焉險隘不乘上陵必下與士同勞佚  
焉軍炊熟乃食軍井通乃飲軍壘成乃就舍與  
士同饑飽焉合戰必立矢石之所及劙膚貫肘  
與士同安危焉馬如羊不入廐金如粟不入懷  
與士同貨賄焉投醪挾纊屹疽封尸與士同甘  
苦死生焉蓋至采薇而念其室家出車而叙其  
况瘁杕杜而憂其父母東山勞歸而細及於伊  
威嫋娟鶴鳴婦歎若目擊其家人父子悲喜離  
合之狀而代爲之言者抑何其愛人之深本人

之周而上下一體之情如此其敦以摯也上以下爲體下以上爲心上視將如愛子將愛卒如嬰兒百將一心三軍同力肢體相隨父兄子弟相救視主之急主之患若寇盜入室不得不格莫邪傳體不得不擇爲之出死斷亡而愉焉又何校兵守城之有乎故曰同利相死同情相成同欲相助獵者逐禽車馳人趨無刑罰之威而相爲斥鬪要塞者同所利也同舟而濟卒遇風波百族之子捷猝招杼船若左右手不以相德

同所害也同則諧諧則輯輯則固有不殫其力  
彼且爲同死故吾得與之俱生彼且爲同亡故  
吾得與之俱存同者在我不同者在敵雖讒合  
刃於天下又誰敢在於上者此夫仁人之兵以  
積德擊積怨以積愛擊積憎蓄恩不倦以一取  
萬扞圉不以金湯步伐不以旗鼓執馘殲醜不  
以長組利劍者也蓋不待兩軍相對而勝敗強  
弱之數已決矣是道也湯武得之以亡曷喪誅  
獨夫其民雲霓而望之浙米而儲之簞食壺漿

以迎之倒戈崩角以嚮之何者如林之億萬心  
不敵三千之一心三千之必克賢於億萬人之  
必北也故千人同心則得千人之力萬人異心  
則無一人之用齊桓以九惠服楚定三革隱五  
外諸侯歸之如市矣晉文以三示用民出穀戍  
釋宋圍一戰而霸矣越勾踐以生聚敎訓報吳  
葬死問傷載稻脂而行於國中無不鋪也無不  
歡也父勉其子兄勉其弟婦勉其夫曰孰是君  
也可無死乎三戰而三北之吳其沼矣雖其事

詭其術陰不重之結必解然而飲馬出淖壺餐  
得士與衆同欲之效亦已徵於前事者後世則  
束縛之馳驟之草營而刀鋸之長城間左祗爲  
盜資洛口敖倉反爲敵藉雖欲分國與人而無  
及又何論廟算之勝不勝乎故曰以欲從人則  
可以人從欲鮮濟飲食人之始欲也而俎豆戈  
矛始以言究以兵卽生機而殺機伏焉易之師  
訟次需而受之比與小畜也嗚呼是同欲之旨  
也

千頃齋初集卷之十七

汝南黃居中明立父著

文部

策

問兵以正合以奇勝奇正相生如環之無端談兵者祖之解者曰先合爲正後出爲奇當敵爲正旁擊爲奇前向爲正後却爲奇大衆所合爲正將所自出爲奇又有以異爲奇者有云仁

人之兵成卒成列者有以臨制素分  
言者其於奇正本法孰有當與或曰  
奇者機也握奇爲握機奇與機果無  
辨與則志所稱四機五權其於握奇  
之說亦有符與宋人有言曰吳之書  
近乎正孫之文一於奇意似不無軒  
輒顧其所云奇正者安在亦可言其  
崖畧與然陰其謀密其機詭伏設奇  
遠張誑誘疾擊其不意卽六弢亦亟

言之何與大抵兵無不是機善用兵者無不正無不奇古今名將或減竈增竈張疑不同而同於克敵或逐水草或擊刀斗自衛紀律不同而同於威虜或驅市人戰而拔趙壁或不按陣圖好野戰而金虜辟易或啣枚而入蔡州或不許啣枚而破兀术或以三十萬衆誅突厥或以三千騎破韁利何種種相懸若是倘變出無常權

難預設活機惟人所使固不可以故  
籍定法拘與爾多士挾策負奇而來  
其去危機圖勝權業有成畫於胸茲  
正其借箸畫米時也願悉意陳之無  
隱

善兵者不言兵非不言兵也無一而非兵也善  
法者不用法非無法也無一而非法也夫無一  
非兵則察兵之微在心而鎭錚不與焉無一非  
法則從我生法而法不縛我故世無一人無兵

之用人無一機無兵之法天下有祕於兵而神  
於兵者哉而可以故弦定局拾瀋而膠柱哉兵  
機事也將機身也其運行如晝夜寒暑其叵測  
如陰晴風雨搖手頓足之頃隼起而鶻飛屈指  
伸臂之間雷犇而電爍乍開乍闔乍起乍伏乍  
虛乍實乍陰乍陽豈惟手不能書卽口亦不能  
言豈惟心不及揣卽目亦不及瞬我用正敵亦  
能正一箸之中庚有箸焉我用奇敵亦能奇岐  
路之中又有岐焉奇與正敵與我共之機與權

兵與將操之奇復出奇機還生機敵之謀我日  
異而月殊我之應敵時移而畧易而猥以履常  
守經悠悠之論格於九天九地之高深此與耳  
食何異則六嫂金殿諸編母乃爲徒讀父書者  
之債軍藉乎孫武子曰凡兵以正合以奇勝奇  
正相生如環之無端孰能窮之妙哉兵家之勝  
算盡此矣夫交刃而誓成列而鼓逐奔不過百  
里縱綏不過三舍非正兵耶料堅脆辨險夷審  
機祥備銛利非正兵耶以實待虛以主待客非

正兵耶嚴申令信誅賞驅士如羣羊與之進與之退非正兵耶正兵者左右應麾旗鼓不奸若虎豹之有牙爪而飛鳥之有六翮斯古法之可按而三軍之可輸故曰以正合也然以正當敵敵脆者勝敵暴者勝敵亂而驕者勝非是弗勝矣故兵莫善於奇奇兵者東西易其嚮黑白幻其形步伐改其調靜躁庚其法使敵曾不得測景而觀動焉或張而翕之或取而與之或銳而衰之或卑而騎之或迂而合之使敵曾不得伺

間而寘力焉或撓前而覆後或批亢而擣虛或  
攻所不守或趨所不意使敵曾不得奔走而迭  
出焉地有所不爭城有所不攻途有所不由君  
命有所不受使敵曾不得預謀而桀釁焉蓋與  
飄飄來與忽忽往莫知其所之如山如林如炮  
如燔莫知其所集折謀於談笑玩敵於股掌料  
不爽毫端而發不渝節候故曰以奇勝也仁義  
堂正以待常敵詐力權奇以當猾虜而不然者  
人方爲刀俎我且爲魚肉人方爲窟熏我且爲

狐鼠齷齪然守株刻舟以階覆亡之禍則亦何正之與有兵之道常少而變多故將之道正什一而奇什九曹孟德以先合爲正後出爲奇則猶拘先後也夫惡知先之非奇後之非正乎又以當敵爲正旁擊爲奇則猶泥分合也夫惡知分之非正合之非奇乎劉安以靜爲躁奇治爲亂奇飽爲饑奇佚爲勞奇此以異爲奇者也然可以遇技擊而不可以當節制韓嬰謂仁人之兵聚成卒散成列延居若長刃兌居若利鋒圖

居若丘山方居若磐石此以仁義爲正者也然可以遇宋襄成安君而不可以當韓白槻曰前向爲正則馬謖以之敗街亭槩曰後却爲奇則苻堅以之挫淝水運籌帷幄決勝千里似非可臨期制矣鋒交原野機變斯須亦豈可素分定乎總之知正之正而不知正中之奇知奇之奇而不知奇中之正知奇奇正正矣而不知非正非奇之亦奇亦正也是惡足與窮其端倪悉其幻化乎大抵敵與我無常形奇與正無常用吾

奇在正之外吾正在奇之外藏奇於正也藏正  
於奇也吾奇兵卽正兵吾正兵卽奇兵無不正  
也無不奇也吾正而正吾正而奇吾奇而奇吾  
奇而正奇可正也正可奇也吾正而示之奇吾  
奇而示之正敵不知吾孰正而孰奇也吾正忽  
變而奇又終之以正吾奇忽變而正又終之以  
奇卽吾之兵亦不知孰正而孰奇也此之謂相  
生此之謂無端此之謂發於無窮之源而奇正  
之極致以機爲奇者自吳起之四機始機弩機

也弩有弦有機省括既定而後左右縱送莫之易也以權爲奇者自荀卿之五權始權稱鑄也稱有權有衡平準既定而後銖兩鈞石莫之爽也奇發於機發而微則爲機正不離權正而變則爲權微獨奇有機正亦有機機之紛拏飄忽而成敗分機之活潑員通而妙用見則機也而未始不爲權微獨奇有權正亦有權權之正鋒針毫未不得差權之變百千萬億不可詰則權也而未始不爲機蓋分之則兩義合之則一理

環而應之則活畫而守之則膠而况夫兵者動物也圓物也變物也鋒鏑非闔內之圖日中失崇朝之故處女脫兔之遲疾誰知進退轉丸決水之迅溜誰分上下機懸於倏安倏危之端則一盼九轉猶以爲遲權運於卒然歛然之際則一息萬變猶以爲拙已發則奇而未發則機也機奇無二法也應變則奇而制變則權也權奇無二種也以吳爲近乎正者以治兵論將言之耳然不曰襲亂其屯先奪其氣乎不曰乘垂獵

散設伏投機乎不曰觸而迫之陵而遠之馳而後之乎則何正之非奇以孫爲一於奇者以軍爭九變言之耳然不曰避其銳氣擊其惰歸乎不曰以治待亂以靜待譁乎不曰以近待遠以佚待勞以飽待饑乎則何奇之非正握奇爲握機矣無不是機何言握也大衆所合爲正將所自出爲奇善用兵者無不正無不奇何奇正之別也是故古之爲韜鈴家言者如羚羊掛角無迹可求而號知兵法者如輪扁斲輪無書可讀

微乎微乎冥於無形神乎神乎窅於無聲其持  
若嶽立其駛若河決其深緘若伏蟄其迅發如  
彊弩其影響雙泯闕於重闇其聚散無倪疾於  
雷雨可減竈以示弱亦可增竈以示強孫虞之  
張疑不同克敵同也可逐水草亦可擊刁斗程  
李之步伍不同威虜同也淮陰之驅市人戰也  
不以山陵水澤爲定法有妙於法者矣武穆之  
好野戰也不按古陣圖有深於圖者矣翹以唧  
枚擣蔡州鎧以不唧枚破兀术安在有聲之兵

若無聲也裴以三十萬誅突厥李以三千破頡  
利安在用寡之不若用衆也之數君子者皆變  
風雲於叱咤移山岳於掌握料敵而審權當機  
而導竊何必不正亦何必不奇何必不法亦何  
必法法如必以奇正爲低昂則六弢所云陰其  
謀密其機詭伏設奇遠張誑誘疾擊其不意云  
者豈皆權謫之論而師尚父亦豈非仁義之師  
與蓋奇之言奇也奇則非偶可一人用不可二  
人知可交綏決不可豫言白可獨創而獨行不

可衆聞而衆覩故理不必天地有事不必古今同則至獨也幽居防垣耳寐語防妻子金革鐘鼓防色傳則至密也獨則將自謀之不必入告於君密則已自知之不必公語諸廷而况從外監之乎從中掣之乎旁觀而指摘之乎此未室於謀先市於色未國於量先敵於基而何奇之可施善乎孫武子之言曰將能而君不御者勝夫有不御之權而後有不窮之奇如是則雖謂孫之書一於奇可也

問委積不多則士不行武士不選則衆  
不強兵餉之係於干餗亟矣古今談  
兵制必首成周非以其寓兵於農與  
後世有南北軍材官騎士有府軍禁  
軍廂軍鄉軍其於周制孰爲近與然  
皆始乎振常卒乎弱抑又何與

高皇帝提虎旅定天下置府立衛分戍  
列屯卽沿海守備耑命湯信國經理  
其於古法固兼採而用之乃二百餘

年來不無少敵今陸而烽堠水而余  
皇並兵也月既時犒坐給行賚並餉  
也視

高皇遺法毋骩壞與毋更革與毋失其  
初指與惟是三吳四郡襟江帶海諸  
屯戍綦置星羅意主防倭然一遇萑  
苻小醜輒爾挫衄夫力不能搏孤豚  
而能扼猛虎乎豈窳耗蠹其故云何  
毋乃所養非所用所用復溢於所養

與今倭汛稍寧然借路詭詞又見告矣衣枷霜雨之防何可不預爲之所顧兵旣積脆餉亦積窘捉襟肘見正惟斯時語有之罷民以養兵譬之殺驂以療服今則療不駕之駕焉其何以式於舊章而俾兵農不交困願抒抱以對毋曰肉食者謀之也

歐陽子有言三代而上興衰以德其次鮮不以兵夫兵五材居一焉古今莫之能廢也顧有兵

而不獲兵之利與無兵同有將而不獲練一兵  
與無將同無將是無兵也無兵是無民也兵食  
於民民實生兵民寢於兵兵亦生民反裘負薪  
則兵爲民詘剜肉醫瘡則民爲兵詘天下之患  
莫大乎徒曰有之而無以有之夫徒曰有之而  
無以有之者有兵之名而無其實也是坐靡也  
有食之費而無其用也是立槁也席徒有之虛  
文而溺無以有之之實禍一旦有事將聽其無  
以有之而不爲之所與肉食者謀之何岌岌也

則曷不觀於周制在昔周官以井田起軍旅王六師六鄉六遂散之大國三軍三鄉三遂散之次國二小國一鄉遂散亦如之其人視賦其賦視地其地視上中下爲參兵而農也春振旅夏叢舍秋治兵冬大閱卒乘服習稽人成功農而兵也故比閭族黨皆伍兩卒旅之師蒐苗獮狩皆攻圍擊刺之法卿士大夫皆將帥司馬之職入而宿衛出而成守無事而櫛襫有事而杕杜役於兵者皆丁壯不必發老弱之民廩於兵者

皆精銳未嘗養無用之卒國無籍兵之煩兵無  
坐食之費守固戰克制莫善此矣三代而下井  
田廢兵農分其最號近古者莫若漢其得寄兵  
於農之意者莫若唐漢制南北軍衛宮都城材  
官車騎樓船分屯郡國期門佽飛擊羌戍胡兵  
稱精焉然吏卒起田間從軍天子臨饗衛士必  
勸以農桑則烏乎農之非兵唐制京師置十六  
衛中外置六百三十四府兵籍於府將隸於衛  
其能騎射者爲越騎餘爲步兵而統以折衝果

毅都尉兵稱勁焉然開府八百聚屯關中者五  
皆力耕積穀以農隙習戰陣則烏乎兵之非農  
至宋而兵愈多食愈蕃兵農愈分禁軍廂軍鄉  
軍班直屯駐盡聚食於農義勇保甲之麗藉者  
至七百十八萬且不當一卒用矣故蘇子曰漢  
兵雖不知農而無聚食之弊唐兵雖聚京師而  
無坐食之弊宋有其兩弊無其兩利益其始未  
嘗不克詰張皇而後乃凌夷大壞漢兵之弱弱  
於謫及七科罷都肄而省尉候也故禁軍歲出

而首反疲於奔命唐兵之弱弱於停上下魚書  
更彊騎而募市人也故方鎮鼎峙而足反操其  
重權若宋之積衰則景德熙寧遞銷遞減令禁  
廂鄉畊之卒單至刺捉白徒以塞伍也故終宋  
之世非多兵自困則撤兵自弱內外单虛首尾  
衡決豈非兵農之分流弊致然哉我

高皇帝提虎旅定中原當秉旗麾鉞之秋講養  
軍衛農之法分府置衛列城設屯內則錦衣等  
十二衛衛宮禁留守等四十八衛衛京師而握

之五府練之五軍營卽漢之南北軍也外則畿  
甸五十都指揮二十一留守司一衛百九十一  
所二百十一卽漢之材官騎士分屯郡國也諸  
衛所軍屯什七守什三軍屯田五十畝官給牛  
種且耕且練卽漢之勸衛士農桑與唐之府兵  
關中聚屯也

高皇帝若曰吾以土之毛食土之兵以土之兵  
爲土之衛故養兵百萬不食民間一粒有徵發  
取之額軍而足餉亦取之屯而足臨戎有指臂

之使登陴無庚癸之呼重譯獻琛潢池喙息翳  
獨其制之綢繆蓋

聖祖之聲稜實赫濯之恬熙歲久兵畔甲銷二  
百餘年來毋論營制遞更將媿士窳卽邊徼海  
壠諸戍按符而討軍實能盈額乎卽不盈而存  
者能執銳披堅乎能彎半石弓而馳欵段馬乎  
卽能之見敵能前鬪乎鬪能陷陣先登乎尺籍  
不足益之召募而召募復然召募不足益之徵  
調而徵調復然且有召募徵調勢不能不益餉

而又不能割軍之腴以餉是昔之餉兵一而今之餉兵二也矧其詭籍影射兵不必盡在行餉不必盡在兵也如近日遼左見告大司馬覈官軍舊額業耗其三之一彼衝邊要害稱西北馬國而猶若是况三吳之素號文弱者乎吳冠帶之國四大都苞海帶江切與倭鄰風帆飛渡瞬息千里而海寇復勾之內盜又復藪之嘉靖中四郡中倭暴慘毒大者屠城小者掠堡蓋無歲不苦兵矣朝鮮之寇焚巢沸鼎震鄰業業今雖

稍幸息肩而假道詭詞僩焉有窺屬國心匪茹  
蠹動未必其不南指也有如腥風再颶豕突搗  
虛巖而犯我舟山乍浦海上諸戍能出偏師向  
島夷發一矢乎能設奇兵破颶浪橫截邀擊之  
海上乎比聞鑄山煮海亡命武有力之徒囁聚  
鯨波血人干牙官軍遇之披靡夫力不能搏孤  
豚而可扼猛虎乎疇昔湯信國經畧築金墉分  
水寨材官蹶張棊布牙錯豈其積窳若是今陸  
而烽燧水而余皇非乏兵也歲儲月饟行賚坐

犒非乏餉也主有丁選矣客復有勇健勇健果勁於丁選乎額有長兵矣暫復有短兵短兵果勁於長兵乎主不能軍乃借之客軍不能戰乃益之募天下無益田而有增兵有祲歲而無損餉柰之何不貧且憊也且兵必待民而有是槩充謫發皆木偶矣兵必待益而具是陸哨水操皆象人矣縣官何利於象人木偶而歲貢糧糗扉屨以飽若曹是兵廩歲額皆漏卮矣居常索餉則有兵臨警徵發則無兵伎作奔走以爲工

役則有兵聞金鼓之聲使操矛盾而應則無兵  
挂錄投閑買差替役可盡檢乎身一而籍二名  
公而力私可盡勾乎債帥以月錢爲固然兵尉  
以剖剝爲常例而士能宿飽乎六花九陣教者  
不必諳占役廝養主者不敢問而士能整伍乎  
寅而集辰而罷已而集未而罷投河角觝僅同  
兒嬉軍書羽檄幾成幻錄甚者挾無弦之弓挿  
無羽之矢懸無鞘之刀以爲習慣故常云耳有  
干行而鞭撻貫耳者乎有臨敵不用命而戮社

釁鼓者乎蓋樞府推轂多以譽遷偏裨登壇或從賄取旣輸財於此則不得不取盈於彼彼旣效貨賄則此不得問驅劙而且利其縮胸以爲筦簟而且幸其脫籍以爲囊橐士狃其無不如此也雖有熊羆化而蝟蜒矣尚安望其搴旃爍旌爲國家效死力乎嗟乎以有盡之民膏餉無用之孱卒國斂民財以贍兵兵割月糧以供將斃斃小民澤竭罄懸且朝夕不相保又况乎陽侯害稼權使橫征柰之何不窮且盜也民旣

兵之餉餉益省養一兵得一兵之用兵益精祛  
三無還二有除兩弊收兩利妨

聖祖之初意師周漢之遺規意在斯乎不然容  
容焉泄泄焉聽其徒有而不必有其有恐天下  
之無以有之者不獨一兵肉食岌岌無已時矣

千頃齋初集卷之十八

汝南黃居中明立父著

文部

啟

賀王太倉相公

代

彤廷特簡蒲輪詔起乎東山黃閣總揆槐位班崇於北極光生鼎鉉慶協冠紳恭惟相公閣下一代偉人三朝元老矢心天地精誠結主上之知砥節伊周丰采係百僚之重舉世皇皇

奠枕惟公穆穆迓衡雖林泉遂志於初衣然中外懸情於歸袞謂安石不出當如蒼生願司馬亟還再相天子神明眷德皇鑒葵忠思已效之鹽梅人惟求舊營將來之金礪寵更從新制麻首陟三公鈞席獨先四輔絲綸歸美極臣子之寵觀簪紱騰歡賢人情於夢卜從茲挽回造化卽春天下之秋指日旋轉乾坤立泰域中之否洵熙朝之盛事爲曠代之奇逢某東海波臣南州賤士幸依河潤夙瞻傅說之舟仰

止嵩高猶隔阿衡之鼎忽聞鳳書而鼓忭願  
隨燕賀以趨踰何日立光範之門倘容斂板有  
懷繼狙狹之頌莫罄颺言惟祈赤鳥登朝蚤  
憇丹宸側席五百餘年名世泰運方亨二十  
四考中書晉蕃玲錫

壽申長洲相公并賀存問代

青宮毓慶九重錫類於尊親紫閣疏榮五  
位宣綸於憲老輝生鼎鉉喜溢冠紳恭惟相公  
閣下一德格天三朝遇主十四載中書之

考夷夏咸安五百年名世之期 明良交會作  
孚先於百辟穆穆迓衡開壽域於八荒皇皇奠  
枕 上方眷忠以無已公獨遜碩而不居謝政  
黃扉怡情綠野司馬入洛之年尚壯未應枕石  
漱流太傅還山之望逾隆佇俟安車束帛袞繡  
爰遵於鴻渚簪裾世濟於鳳毛惟元老引年之  
再加屬 宮闈慶澤之弘播皇華 寅翰賁降  
金闈文綺精鏐鼎來 玉陛天保定爾介景福  
以無疆 帝命寧予垂隆恩於有赫允矣巖廊

之盛事豈惟林壑之寵光某承乏吳藩欣逢曠  
典况茲建酉之候正值生申之辰得其壽得其  
名恭祝千齡之盛日俾爾昌俾爾艾長觀八月  
之清秋周家之渭鈞未移漢室之蒲輪且駕謹  
陳澗沚用頌岡陵

賀李九翁相公代

恭審妙簡元台進持魁柄制麻同日並分鼎  
鉉之榮枚卜盈廷獨荷宸旒之眷洵巖廊之  
曠典爲泉郡之破荒恭惟相公閣下忠結主

知道先民覺 形墀奏第雲開五色之祥徵玉  
筭蜚英風動四方之景仰效論思于虎觀志在  
格 君典制作於鳳池文能起代造髦璧水貳  
禮陪京素養望於留銓遂升華於常伯 朝推  
砥柱障浩氣於頽波庭絕筐篚凜清貞於介石  
蓋自甘泉持橐已負傳野調梅衆多不便其孤  
芳 上獨深知其亮節 絲綸歸美破羣議以  
登延簪紱騰歡聞新參而忭舞東閣班聯四輔  
中台翼贊萬幾列坐盡夔龍交孚一心一德彙

升有韓富况出同榜同鄉風雲之會不常日月  
之明增曜某松榆晚進樗櫟散材夙冶鑄於鴻  
鈞倍忻躍於燕賀豈曰鄉有元老敢徼私庇於  
二天誠以國相名賢幾覩太平於一日屬者  
宮廷金匱因之國是紛呶上以循默爲包  
荒下以攻訐爲聚訟薰猶共器逾不信乎主  
心首鼠兩端祇求調於衆口以上倚公之重  
將安危休戚之是依以公報上之周豈利害  
譽非之足計先聲儉簡行回風俗於侈靡之餘

正色直方卽振 朝綱於凌夷之後補天浴日  
熙然春天下之秋旋乾轉坤廓爾泰域中之否  
敢因蕪頌敬效管窺

賀葉臺翁相公代

宸旒簡命中台宣上相之麻揆席調元北斗曳  
文昌之履 肢夢朕卜允叶人情之同汝翼汝  
爲其代 天工之曠先生槐棘慶溢松榆恭惟  
相公閣下學擅儒宗材優王佐蜚英翰苑承明  
流著作之聲造士成均譽髦樂菁莪之化晉

官僚而勸講羽翼溫文贊留部於秩宗寅清夙  
夜久勤典禮載貳銓衡衆皆躍冶以爭先公獨  
循牆而處後四海之瞻巖特重拭目袞歸 九  
重之側席方殷垂思 輪召問 朝問左右舉  
無異言惟 天惟 祖宗咸享一德遂升常伯  
徑秉大鈞金甌覆崔相之名銀信趣鄴侯之覲  
廷紳舉笏相賀班四輔以登延都民遮道聚觀  
開新參而鼓忭蓋內魏並相况出一鄉而韓富  
齊名復同兩榜洵 懿朝之盛事爲曠代之奇

逢某誼竊維桑情深仰斗自分海隅萍梗無緣  
登傳說之舟願備藥籠渤澥終難薦阿衡之鼎  
敢續狙狹之頌載賡慶曆之詩黑頭公相楊文  
敏而後一人赤舄勲名李忠定於今再見 帝  
賚弼用作霖蚤憇 朝端之望 君命召不俟  
駕勿爲周南之淹

賀南大司馬孫公榮加官代

陪京作鎮勢控金湯樞府詰戎權嵒鎖鑰蓋參  
密勿機衡之任宜藉文武經緯之猶歲闋甫騰

寵章臻錫 帝書上考荷 九重特達之知秩

晉孤卿輩八命穹崇之寄同朝侈爲盛事澤國  
尤倍恒歡恭惟閣下世篤忠貞天胙明德家風  
有自名矣中丞之後人國士無雙褒然南宮之  
首選郎星明燦繇兵署禮署以司銓卿月高華  
歷容臺銀臺而秉憲辟車望重半裁夙震於百  
僚制閭功高威信遠孚於九塞運籌決策先聲  
寢驕虜之謀却貢止封抗疏落黠夷之膽自拂  
衣逍遙於綠野乃歸袞懸注乎蒼生 詔起東

山紀綱南服烏府爲臺官長身挾風霜金陵係  
天子都手扶日月  宸衷簡在  巽命重申爪  
牙居圻父之司喉舌總漢官之重峻文昌於北  
斗獨冠常伯之班偃太乙之霧旗茂著干城之  
烈名垂八座績奏三年載錫  廷綸爰加  宮  
秩少保階聯四輔  鶴禁之羽翼攸資夏卿地  
切三台麟閣之圖形何忝雖循墻之勞謙愈亮  
而  當寧之渥眷彌溫錫魯公山川土田康周  
公故大啟爾宇釐召伯圭瓊秬鬯自召祖而受

命于周蓋詔德詔功自昔已然而肯堂肯構於  
今爲盛某竦瞻巖采聳聽制麻江左見夷吾  
無復憂驩聲已馳於畿甸中國相司馬勿生事  
夢十竚叶於人情敬陳燕雀之私輒憑魚繭之  
素五百年名世鴻庥濟美於鼎彝廿四考中  
書駿惠重光於簡冊有懷鼓忭莫罄頌言

賀總漕李公加腳戶部尚書代

總漕天塹中都擁牙纛之尊加秩地官北斗正  
文昌之位爰峻上卿之秩增崇計相之班  
黼

卷之二十一  
庚子年  
辰出綸軍民挾纊恭惟臺下清和而任直大以  
方兩朝浴日之心德同威鳳十載擎天之手  
功掩巨鰲允武允文分陝匹周召之治已饑已  
溺匡時同禹稷之思洗當道豺狼以絕踪未皇  
皇而莫枕集中澤鴈鴻以安宅矻在在之長城  
河內願借寇君油幢暫駐關中仍留蕭相寵  
綺維新晉長九農升華八座聯六卿於紫橐身  
上星辰輦三輔之黃圖手扶日月方公私之積  
可哀痛宜還春意於閭閻况財貨之出有源流

豈折秋毫於戶版自天有命行且宣北闕之麻惟帝念功寧久作南邦之式遄歸袞繡徑秉鈞樞某乘障列藩莊身廣廈高山仰止喜聞君子之得輿陰雨膏之斬免波臣之涸轍固知木牛流馬不難轉粟以上天竚看舟楫鹽梅卽肖象形而賚帝肅馳函於戟府容斂板於和門其爲頌溪曷勝鼓忭

賀操院耿公擢南少司馬代

烏臺作鎮時殿天子之邦鳩氏誥戎獨專樞

筦之柄蓋非文武之經緯曷贊密勿之機衡  
上眷逾殷中權彌重恭惟臺下先天民覺負王  
佐材弟兄皆瑚璉圭璋羣英折北伯仲於濂洛  
洙泗吾道已南閩越還正始之風河嵩重分陝  
之寄遂自容臺而司匱載遷開府以建牙經綸  
禪幄之間月柝燈碁之烟燭彈壓江淮之上參  
旂井鉞之堂堂壯猷書績於九年制勝折衝乎  
千里渙駁周誥晉陟夏卿爪牙參祈父之司疇  
庸東掖喉舌作尚書之貳乃副西曹若曰進有

德則朝廷自尊洵矣用真儒而天下無敵山川不離指顧留都益鞏於金湯草木亦熟威名北門倍增其鎖鑰某備兵婁水託照斗山江左見夷吾復何憂知人情之久屬中國相司馬勿生事諒夷膽之已驚敬勒荒函恭陳蕪頌願曳星辰之履名覆金甌行紀日月之常功垂玉鉉戢五兵於不試扶二曜以常明鼓忭無涯颺言

曷馨

候李九翁相公

代

宣麻一紫禁資哲輔於三台亮采黃扉歸神功  
於八柱齊泰階兩兩之色政參密勿之籌增  
寶曆萬萬之安忠結一宸旒之眷瞻巖獨重前  
席正殷恭惟相公閣下一代真儒七閩間氣效  
論思於講幄志在格目君佐典禮於容臺節能  
砥世身任天下利公家無不爲力挽頽波攖衆  
忌而弗恤金甌協卜晉陪斗極之樞玉鉉疏榮  
鼎正文昌之座若濟川而立傅得師者王如聘  
野之須伊匪予誰覺况苞苴筐篚素不入沂公

之門而鼎鼐樓臺亦未聞寇相之第人欲自絕  
何傷日月之明 帝鑒無私豈待風雷之變某  
留曹竊祿夙注斗山婁水備兵更荷覆露第以  
江湖外吏久絕迹於朝紳所藉簪紱世交敢通  
書於政府僭憑魚繭之素恭陳燕雀之私亮天  
地而弼 一人知益廣無彊之聞理陰陽而遂  
萬物尚祈澤不獲之夫式貢寅丹副在子墨

候葉臺翁相公代

宸旒簡命晉位紫樞揆席調元均茵黃閣身膺

鼎軸象四輔以亮工手握斗杓考六符而弘化  
蓋雲龍風虎同氣斯求威鳳祥磨逢時乃出恭  
惟相公閣下千秋王佐百代儒宗自從甘泉  
持橐之班已負商室和羹之望陽休山立粹然  
廊廟之珍地載海涵綽有台衡之器東宮勸  
講精忠元簡於帝心南部貳銓清德允孚於  
民譽十行渙寵八座升華名啟金甌間兩社以  
爲輔職親玉鉉咸一德以格天風霆不顯其  
流形啟沃同期造膝水火交成於正味規隨永

彌仔肩此六服於焉具瞻正九重所以延竚  
某南州賤士東海波臣幸託年家兼陪末屬士  
曰時哉相司馬皆舉笏以相驩誰其識之有歐  
陽辱捲簾之已素顧江湖流梗空瞻傳說之舟  
豈沼沚微毛可薦阿衡之鼎惟藉鑪鑄之舊况  
看枚卜之新謹稽首以颺言用齋心而致禱書  
投光範敢徼私庇於二天頌擬狙狹願睹太平  
於一日仰祈汪度俯鑒贊虔

同鄉合請史少宰公

槐堂聳望齊瞻北斗之尊梓里割榮更託南天  
之莊樽俎載修於燕喜消塵仰瀆乎鴻慈恭惟  
老先生閣下學冠儒纓文裁 帝袞 蠨庭奏  
賦卿雲開五色之祥 虎觀橫經穆風動 九  
重之聽 絲綸掞藻豈班香宋艷之敢方文武  
題材卽麟角兔置而畢採旋從函席晉貳文昌  
株陵 天子都手扶日月荃宰列卿長身上星  
辰正色以刑百僚若喬嶽泰山之不動黜幽而  
獎羣吏等玉壺冰鑑之無私惟精忠簡在 帝

心一德咸有况長材身兼數器庶績其凝名覆  
金甌行接七闕之盛事麻宣紫禁應符五百  
之昌期某等同忝枌榆或叨桃李浮萍斷梗幸  
依傳說之舟澗芷溪毛欲薦阿衡之鼎日維西  
陸節近中秋虹渚星流嵩賀將呼於萬壽  
風雲玄感斗躔先見於三台敬卜芳辰恭陳洞  
酌歡同北海納爽籟於層宵勝擬南樓待月光  
於別館仰奉元公聲欸樂且無荒俯容參佐追  
陪興復不淺願言曳履蚤賜鳴騶閱八磚之過

影共領玄言分雙燭之餘輝尤飫明德

候少宰楊公代

齒東海之波臣茫無操挾瞻上台之荃宰獲遂  
皈依敢乞大塊之鑪鑄用裁小夫之竿牘恭惟  
閣下名高百代望重兩朝始通籍於郎星歷  
升華於卿月黃流玉瓊巖廊共挹其清芬朱絃  
素絲省寺咸推其直節其間出處潛見之迹若  
瑞世之鳳麟總之勁正貞白之操比傲寒之松  
柏旋陟容臺而典禮載司封甞以納言忠簡

帝心揆留 皇鑒佐斗杓以輔政坐均四海之  
宜凜冰鑑以題材立辨九流之品士有連茹之  
拔人無積薪之嗟卽正宰衡左右宜咨於汝翼  
佇班揆席平章時彌乎仔肩某謬廁臬藩久慚  
寐曠調停無策其柰澤中之鳴鴻撫字多方莫  
濟江南之涸鮒應課殿以下下豈徼福於容容  
惟老老及人方慶 皇慈之浩蕩而親親錫類  
更沐 坤厚之汪洋敢循例以陳情用干恩而  
請命仁自率親而率祖總煩啟事之山公孝資

事父以事君願爲移忠之曾子戀深烏鳥 詰  
乞 龍鸞藉留署一日之知懷上相二天之庇  
寵光三世豈爲榮身以榮妻盟矢千秋何以報  
公惟報 國祇陳覲縷曷旣編摩

迎操院丁公

代

伏審 宸旒渙號天塹宣威二百年王氣鬱葱  
特壯金湯之固十四郡地形險阨盡提表裏之  
封疏 恩冠獨坐之班執憲建元戎之纛凡居  
節制倍切忻愉恭惟臺下命世儒宗清朝名碩

學窺伊洛之秘都人範其楷模治倣漢吏之循  
天子召爲臺諫激濁揚清之雅志雖百鍊以難  
移難進易退之高風歷三聘而始出爰自法星  
之璀璨竚登卿月之光華兆已符於夢松階遂  
長乎列柏隼旛熊軾坐鎮京輔之上游虎踞龍  
蟠全界東南之半壁此日輕裘緩帶暫試開府  
之勲他年赤鳥繡裳卽下還周之命蓋安危注  
意留都之鎖鑰舍我其誰而文武憲邦密勿  
之鈞衡非公莫可某倏聞綸綺如拜麾旄方

千里曰 王畿正倚干城之偉畧統六帥平邦  
國佞性觀樽俎之折衝謹削牘以候鳴騶且負弩  
而迎飛鷁鵠鶚直上行聳絕迹於昂宵燕雀界  
棲更賀生成於大厦無涯引領曷罄颺言

賀黃九石中允

恭審 宸旒渙號 儲家升班啟佑 前星求  
博聞道術之選弼成 少海懋恭敬溫文之功  
雖十年詞苑之序遷實近日儒紳之曠覩仰惟  
閣下學窮聖繹德萃天精奏籍南宮名題慈恩

千佛頂之上紬書中秘試首瀛洲十八士之先  
翰藻掞庭可使班揚韜筆 絲綸緯 國直與  
伊傅爭衡分雲漢以爲章胸苞萬有比滄溟而  
挈器量總羣流徧儀荷橐之華獨結 楓宸之  
眷高文大冊旣推鴻碩之材紆謨遠猶仍奉燕  
閒之間將腹心於 密勿預羽翼乎 東朝益  
豐水之謀獨先於詣 子宜商山之助必輔以  
正人 主器斯安不基益壯自是橫經 青禁  
龍夾日以升霄行矣秉政黃扉輦戴山而立極

某授族江夏派共甫中附籍仲篪義叨世末瞻茲溝中之斷索蒙堂下之攜喜聆綺溫頓忘  
羶冷不模不范雖未免諸生之榔榆或挽或推亦恃有故人之齒頰燕雀依萬間之芘全藉帡幪鷦鷯安一枝之棲終歸卵翼惟舊雅毋忘戴笠况下情倍切彈冠仰乞露仁俯垂電鑒其爲卿結曷旣編摩

賀兩浙開府甘公

代

疇咨舊弼疏寵元戎 詔起東山閭望雅推於

三獨惠綏南國節鎮獨首平諸藩  
宸命風馳驩聲雷動恭惟臺下安危注意文武壯猶自鳴  
琴而錫異名封旋衣繡而升華大棘辟臺名重  
允爲憲於萬邦仗鉞功高聿揚威於三輔山中  
讀禮益徵余佩之芳越土建牙特見 帝環之  
錫蠶鼓犀渠之部曲廣招君子六千隼旟熊軾  
之光儀坐撫都城百二碧幢彈壓共鞏金湯白  
羽指揮誰奸旗鼓某故從斗下夙欽烏府之聲  
霧茲竊鄰光更分駱越之臨照遙瞻棨戟巍握

塵之無從日跋旌麾知執鞭之有待端修手板  
用表心旌迹雖阻於登龍神已馳於賀燕河潤  
寧惟千里仰借汪洋塵埃已識九方終歸剪拂  
候大司馬舊總河李公代

仰烏府之照臨曾塵下吏徼鴻鈞之冶鑄永託  
上台矢明德以弗諼溯流光而靡逮僭憑子墨  
式貢寅丹恭惟臺下應運襲龍中興方虎腹具  
甲兵以萬數動番安攘之勲胸吞禹貢之九河  
雅負平成之畧殷鈴傳自黃石武緯文經疏淪

授於玄夷玉書金簡天不生姬曰誰提東國之  
斧斨 帝惟賚傅星用濟巨川之舟楫所以鯨  
鯢盡洗翻成鴈鷺之池從茲璧馬並沉永奠魚  
龍之窟功收舞羽績成錫圭蓋一命再命三命  
而益恭將大書屢書特書而未已 帝曰汝居  
祈父且宅揆以秉國成公云有懷二人乃讀禮  
而卿家恤雖倚廬歸臥願追綠野之遊然宣室  
儲思當爲蒼生而起行矣環召遄焉袞歸某猥  
以踈庸舊承綱紀從戎行稱末屬有若泥塗之

在埴然去澤國作波臣無柰族庖已更刀也稟  
焉以爲政祗奉明威赦其所不閑幾騰薦牘慚  
報稱之無地徒切捫心感覆露之自天自惟踈  
目謹修芹藻之敬聊櫞葵藿之傾茹鑒是祈編  
摩曷旣

候李總漕

代

齒塵埃之下吏濫備將輸贍雲漢之上台忽蒙  
推轂倘非大鈞之块丸安得衆竅以吹噓施重  
人輕報深語淺恭惟台臺基命兩社棟 國九

挺壯尹吉甫憲邦之猶允文允武平召康公分  
陝之政不競不綵驅狐豕以潛踪集鴻鴈於安  
宅龍蛇赤子幾多卵而翼之羔羊素絲疇非則  
而象者蓋惟實見得是口與天爭所以正氣不  
回力持風紀導河淮而東注坐鎮咽喉之區扶  
日月以大明行進腹心之地某故依燕廈殊覺  
鴛鴦去澤國作波臣會計而已矣撫勞人思屏  
翰繭絲云乎哉巧婦戶之尚難責無麵之餅老  
農惰矣安能取不稼之禾三年之刻楮猶艱千

里之飛芻正亟方虞罪罟媿積捫心伏讀封章  
感深次骨雖繡衣六條之譽定匪徇私然華袞  
片言之褒終疑溢實敬修手板用攄心旌泥在  
范金在鎔是全託一陶之造川作舟旱作雨祈  
永遂萬物之宜

上大司徒趙公

代

聽尚書履久綴地曹之下僚分刺史符忽叨雲  
間之上郡職方雖二三縣歲餉已百萬餘吏多  
請寄之奸欺里有難平之徭役文移星火不勝

權使之誅求訟牒丘山半爲征輸之繁重况地  
濱湖海萑苻時發乎不虞且俗競紛奢公私並  
訕於凋敝網疎則魚漏繩急則麿驚欲經緯以  
咸宜顧韋弦其匪易而某以社樗構槁當東南  
盤錯之艱以膏粱鈍昏值上下煎熬之困調停  
無策知法出而奸生撫字多方柰心勞而政拙  
鉛刀僅效其一割鼯技已殫於五窮蓋昔者轉  
漕是邦方懷尸曠乃重來作牧茲土逾積愆尤  
恭惟閣下東魯岱宗中朝柱石升華部寺蚤

流譽謗之聲秉鉞河嵩蔚爲文武之憲擾兆民  
敷五典主計而望重素絲均四海統百官署銓  
而譽歸冰鑑何意庸材之樸邈誤辱大造之陶  
甄提攜每錫之誨音折節而升鬷蔑馨欵必假  
其毛羽逢人更說項斯一麾專城旣蒙恩於袞  
借六條督吏更獲庇於瓦全惟我公臨別數言  
方憂五茸之逋賦而界職拊循二載莫濟三邑  
之罷民自慙省躬有負知已所願宣麻黃閣調  
鼎紫宸浮圖成自合尖正臺台補袞之日洪

爐終歸冶鑄是下走卿殊之年聊貢寅丹僭

子墨頂踵洵非已物形神已徹中清

謝南少司徒總督趙公代

仰台鉉之上公如瞻巍巍齒塵埃之下吏幸託  
大鈞倘非造化之全功安得濫竽於衆吹受知  
嬖積懷感輪囷恭惟台臺清廟琮璜 中朝柱  
石階自于菴于臬駿致卿月之高華心則爲上  
爲民獨係世風之竅會庶支司軍國重計身綂  
地官秣陵爲 先帝舊都手擇天柱蘇瘼培九

農之扈欲還春意於閭閻制用先八政之圖豈  
折秋毫於戶版行調梅而扶日月佞性履以上  
星辰共推阿衡之覺先况有伯禽之拜後某幸  
依綱紀夙求牧芻從澤國作波臣會計而已矣  
叨戎行思保障繭絲云乎哉欲潤枯魚僅西江  
升斗之水瞻言鳴鴈柰東人杼軸之空方虞罪  
咎莫遁鉄誅伏讀薦章榮逾袞獎譬若泥之在  
埴敢忘坯冶于一陶自是駑之取途尚冀鞭笞  
於十駕勉酬祁舉敢負宣知永矢弗諉有懷莫

吐

復大同巡撫霍公

代

鎖鑰北門坐擁雲中牙纛馳驅東海遙瞻天上  
星辰忽承筐之鼎來豈報璫之敢後榮增一盼  
感切五中恭惟臺下威鎮華夷望傾朝野敦  
書悅禮發鈴採虎豹之文決策運籌經緯著麒麟  
之烈秉旬宣之十載勤式遏於三陲黃鉞登  
壇壯七萃五屯之衛玉關賜履專五侯九伯之  
征風猷遠播於塞垣恩信允孚於醜類蓋昔在

外服嘗未雨而徹桑土之防乃今晉中丞遂先聲而落旆裘之膽某備兵澤國仰止斗山握塵無緣心旌徒懸於五堡登龍有待手翰倏拜於雙魚謹稽首以屬言敢齋心而貢謝欲報之德何以爲期惟折箒以答名王佇歸袞而相天子

候大京兆徐公代

留都雄三輔根本要區京尹總十連蕃宣甸服彈壓先輦轂之下折衝在樽俎之間卿月騰輝

福星拱照恭惟臺下膾鳳屠龍之手擎天浴日  
之心白簡風生豈遑問仗前立馬皂雕電擊不  
難批領下逆鱗肘後有醫國方舌底出冰人語  
民歌驄乘千秋已社而稷之朝仰羔絲百辟多  
則而象者瞻茲石城虎踞勢阨江淮况屬豐鎬  
龍飛邑傳湯沐提封全跨乎千里佳麗昔壯於  
六朝少尹舊游久導竅於游刃真除載寵益就  
熟於輕車得地大儘可廻旋去天近何難展布  
召伯保釐南國方憇蔽芾之棠晉公臥護北門

永固歲麌之鑰暫焉居守行矣宅揆某樗櫟無  
庸節旄索寄幸備員於澤國蔓仰止於斗山念  
切登龍其如匏繫情馳貢鯉以表葵傾京兆有  
次公知不用趙張之小智夷吾在江左願一洗  
王何之清談

候姚問卿

白簡回天茂著郎星之望青蒲扶日峻登卿月  
之班孤忠上簡於宸旒華貫榮躋於罔寺  
暫娛畫繡旋秉大鈞恭惟臺下履道如弦比德

於玉儲英祕閣已盡抽四庫之藏陟諫瑣垣乃  
進立七人之列當官庭之金匱正國是之  
紛呶競求容容靡聞謗謗公獨抗疏幸明主  
可與忠言帝亦孚圭喜聖朝漸無闕事豈  
一發之爲快且百鍊而比剛龍蛇騁兮誰砥中  
流之柱鳳凰鳴矣于彼高巔之巔汲長孺十年  
禁闥直已效於從繩仲山甫一日城齊望特懸  
於歸袞命汝作大正思馬斯臧欽哉慎乃僚惟  
人其吉化成圉牧定多雲錦之羣瞻具台衡卽

騎尾箕而上雖方枘圓鑿不能與時俗浮沉然  
野馬塵埃何足爲太空增損某夙叨世雅過辱  
殊知從北邸別龍光永懷明德向西冷覓鯉素  
猶缺起居臯擢髮以難開惠銘心而莫報顚申  
勸駕竊附彈冠鷄肋自憐尚擬搏風之假羽驥  
心未老願言逐電以加鞭

迎陳漕院代

木天吹火窺石渠金馬之藏柏院飛霜仰素絲  
羔羊之節褰帷問俗新禮樂之光華將漕餽軍

壯江淮之彈壓上流勢重 中宸眷隆恭惟臺  
下奎璧孕精衡湘間氣名題千佛蚤籲俊於  
彤墀材富三冬旋儲英於秘閣周情孔思允宜  
登學士之堂宋艷班香奚翅得舍人之樣惟司  
存於雨露遂感會於風雲都門驄馬行行共識  
殿中之雅鎮城社鼠狐落落爭避柱後之先聲  
邊儲方望於飛芻 廟算復殷於敷土誰馳四  
牡坐幹萬艘 帝曰汝諧乃命恤功之川后  
朝惟公可仍煩主粟之肅何障狂瀾而東會見

陽侯之順軌駕長航以北佇看風伯之效霧六  
轡如絲雖賢勞於原隰三軍挾纊行紀績於鐘  
磬邦有德星民無罪歲某吳關委吏海國波臣  
東南之民力竭兮正需咨度西北之疆場亟矣  
尤藉轉輸繭絲乎保障乎公必本根之急導黃  
也疏泇也相惟荒度之宜文武具瞻願快覩木  
牛之運軍民引領已紛爲竹騎之迎謹負弩以  
候鳴騶先削牘而申賀燕此時風薰財阜偕彩  
鷁以來思他日地平天成與玄圭而比德

候馬直指

代

六條察吏夙依龍光之照臨一字拔人更沐烏臺之薦剡何意緇衣之好揭來華袞之褒儻非冶鑄於大鈞安得濫竽於衆吹伏念某茫無操挾積有愆尤郡號股肱綿力動虞掣肘民殫膏血窮樞日切劘心欲潤枯魚僅西江升斗之水耳睠言澤鴈柰東國杼軸之空何卽茹荼以自甘顧勞薪其奚補考宜下下豈徒拙於催科容以休休幸焉包其荒穢爲天啟齒不遺蟲臂之

收據地承顏何有豚蹄之祝感深於髓魄溢其  
肝伏惟台臺負經濟模攬澄清轡馬繡衣之  
使洵直且侯羔羊素絲之風甚德而度念人才  
難得易失寧舍其短取其長故如某功少過多  
亦匿其醜揚其美殆假點睛之筆偶嘗換骨之  
丹鶴牘一騰驚價三倍士固伸於知已蓋非搖  
尾而後憐德不待於成身總合銘心而自厲敢  
不永堅晚節仰答殊私淬此鉛刀少畢處囊之  
願鞭其後乘無狐推轂之恩何以憇深知祗盟

天日苟堪醻大造無愛髮膚

候毛侍御

三鱸地冷久依龍光之照臨一鶚天高更仰鴻  
鈞之坱圠受知惟舊取芘益新覺恩重而身輕  
柰報深而語淺恭惟臺下卿雲瑞世霖雨濟時  
法星暎峯泖以長明歲澤與滄溟而比潤克威  
克愛活礪盎者千家宜民宜人祝畏壘以萬戶  
六年課最方滋南國之棠一札徵賢行列內臺  
之栢班聯三院朝常得李勉而始尊司立七

臣 衣職惟山甫爲能補與 天子辯是非宰輔爭得失舍我其誰爲 巖廊關輕重 廟社係安危非公莫可稜稜白簡將坐寢乎邪謀侃侃青蒲且力回乎 天聽 上志已定羣頸胥延某猥以社樗誤收匠石枯朽終淪於溝斷慚負國士之知鶯鳩幸決於捨飛惠徼如天之福扣大鐘而鳴則小患在好爲造浮圖者合其尖幸資巨力仁人厚故忍令席蓐之棄捐下走希榮但把衣冠而拂拭丘山高誼寧容賓土之虧

金石盟心敢負辦香之祝寸衷所矢尺牘難宣

賀張孟奇關使

代

版部升華勇樸望郎之被吳關弭節出塞膚使之帷財阜風薰偕輶軒而交至梅舒柳放蹊原隰以載馳與物爲春望公如歲恭惟臺下清涵沆瀣秀毓羅浮學同安世之洽聞志亡書者三儀識比茂先之博物別瘞劍於雙龍千秋主風雅之盟壇推牛耳五色掌絲綸之美池有鳳毛惟照燭乎民庸故借筋於邦計方公私之積

可哀痛誰與阜通顧財貨之出有本源當加調  
度熟眎弄印誰爲朕行遐思持籌莫如公可  
謂朝廷權山澤之利繫欲足國裕民惟君子  
知取予之權斯可柔遠能邇况茲大東之杼軸  
未集中澤之鴈鴻當剜肉醫瘡之餘民亦勞止  
在諮詢度之事公優爲之養元氣以厚閭閻  
豈屑屑雨天之粟捐錐刀而通商賈不規規流  
地之泉是曰濟川之慈航真將澄潭之止水某  
喜來垂露念切瞻星一帶盈盈欣執鞭之在望

雙旌裊裊想騎竹以交迎幸依駢牡之光華佇  
聽隨車之霖雨敢裁吉語肅候前驅汀鳥渚花  
知入品題之目溪毛澗芷莫酬仰止之思

復徐職方

恭審劍履趨朝驂駢載路輶從星發駕周道  
之委遲槎自天來偕南薰而至止敢布仰高之  
悃輒修記上之恭伏惟台臺毓瑞九龍孕精兩  
目楓宸奏賦蚤誇五色凌雲花縣分符幾見  
千郊化雨案騰邑最躋陟郎潛蔽芾甘棠到處

都成峴首婆娑嘉樹何時不念并州方粉署以  
含鷄遂形闡而市駿雕蟲歸藻鑑紺風雲月露  
之奇相馬得天機出孔壯驪黃之外蓋使渝巴  
體變代還雅頌之音寧獨杞梓材收國受棟  
隆之用人歸水鏡咸入英雄之穀中士仰斗山  
喜出名賢之門下而某猥以樗散之質素乏根  
抵之容願備藥籠夙已皈依虎帳旋避棘試無  
由咫尺龍門乃乞上洋之泠氊正屬明公之舊  
治爭春桃李盡河陽去時之花運北鯤鵬假扶

搖六月之息幸栽培之未遠猶竊蘭芬藉賞識  
之無虛偶同蒞臭然而緣慳御李未敢唐突中  
涓不謂誼篤延然先已榮施下走八行飛擲儼  
金鍾之從天五內震驚恍青萍之入手三薰三  
沐一字一珠荷鼎獎之逾涯有懷環草慚芹曝  
之未獻莫報璠瑤茲值介圭入覲之辰適當躡  
矢先驅之日而某遙羈一職徒瞻紫氣於關門  
爰託雙魚敬效丹衷於茅蹊藻蘋匪腆詎云可  
羞王公葑菲靡遺終當不負洪造仰祈淵度俯

鑒微虔啣刻所鍾編摩莫旣

賀杜漕使

伏審榮驅漢節給饋吳墻舊令尹之雙鳬去思  
未遠新漕君之四牡來暮已歌六轡如絲三軍  
挾纊恭惟台臺負猷鴻碩蓄德駿龐搏羊角於  
青蘋名題千佛試牛刀於赤縣頌起四郊一施  
製錦之功兩奏鳴琴之績河陽花滿樹桃李以  
春熙南國棠成息折楊而畫臥旣騰邑最旋陟  
郎潛顧大東之杼軸其空而塞北之符移旁午

熟眎弄印孰爲朕行遐想持籌莫如公可所  
居民富田里無愁歎之聲簡在帝心原隰有  
光華之遺燭股削侵漁之蠹豈規規流地之泉  
較盈詘出入之經不屑屑雨天之粟漕下冰解  
集苞栩以載馳財阜風薰與轄軒而偕至攬轡  
歡騰於竹馬蜚芻神運於木牛帝有德星民  
無罪歲某鼯窮五枝鷦寄一枝鵠繞月以何棲  
幸二天之獨有魚泳川而相得况尺地之可通  
儻垂慈附驥之蠅庶流波涸轍之鮆情深賀燕

羈冷氊未緣執殳念託飛鴻瞻棨戟有懷斂板  
敬憑子墨式貢寅丹

報孫繕部代

陽春生下國正繁去後之思陰德擬高門復稟  
受成之政規隨每期於畫一提誨不啻於再三  
媿乏先容謬承清盼恭惟臺下靈鍾玉屋翼奮  
天池興公擲地之聲摩空有素韓洎造樓之手  
接武攸宜始佐郡以持衡乃緣經而察麗勾刷  
明精神鑑吏絕舞文平反照徹覆盆庭無冤獄

七年司李三邑成棠遺蔭千秋片石磨礪峴首  
福星一路萬家社稷庚桑 帝曰若予工哉徒  
得君重民云奪吾父矣願借冠留程衆藝飭五  
材 朝望方崇柱石宅百揆司六府 廟謨更  
藉棟隆特參玄武之司適應道人之徇 楓宸  
已稔知治行豈獨儀簪橐之班蘭署不足爲公  
榮當勉暨旂常之績某才卑折線智陋挈錦偶  
代匱於末塵遂委身於下乘情深御李願猶阻  
於登龍想倍識荆心徒懸於托驥顧芹藻未將

一介而瓊瑤先錫百朋法令爲師止圖由舊之  
計藥石愛我忽得告新之言何幸規矩之陳前  
可容瓦礫之在後取依有地奉職無尤在冶在  
鈞終寄鑪鑄於真宰亦趨亦步敢忘繩箋於迷  
津薄寫中丹敬陳副墨

與程台任民部

伏審榮驅漢傳給饋吳襦歌皇皇隰華獨領軍  
儲之重際萋萋春草式瞻使節之新六轡如絲  
九邊挾纊幸斗山之伊邇向溟海以乞波恭惟

臺下神韻淵泓高標嶽峙派宗伊洛知道學之  
已南名紀慈恩攬德輝而直上甫通金闈之籍  
旋含粉署之香入筦度支殷殷露積出司漕輓  
肅肅宵征輸塞北糧糧半屬三吳財賦寬大東  
杼軸全卹中澤劬勞士無呼庚攬轡歡騰於櫨  
馬將遵令甲蜚芻神運於木牛 天子問錢穀  
幾何暫煩會計國人曰冰鑑在望卽秉銓衡某  
猥以樗材謬塵芹序綴末行於榆社久跋識荆  
從伯氏耳蘭芬猶慳御李思日遠而帶日緩永

懷調怒於璫枝舟作楫而旱作霖願庇驩顏於  
廣廈敢徼世雅敬布中涓

賀董思白起建南兵使

北斗持衡久擬錫環於 中禁東山繫望復聞  
弭節於外臺一札起家八州分陝洗印日新衆  
聽褰帷風聳列城恭惟臺下學冠儒纓文裁  
帝袞 彤墀載筆遠超班馬之林 翠幄橫經  
預識夔龍之武暫輟承明之侍從出司荆楚之  
士型玉追琢以彌工盡剖石中之璞金在冶而

不躍並登席上之珍起代維衰廻狂瀾於砥柱  
急流勇退養高節於丘園公雖製芰荷以爲裳  
人實望鱣鯀而歸繡維閩七聚建安控其上游  
奉漢六條澄清綏此南服攬轡秋風驅瘴海苞  
羽倭遲放衙春雨滿辰山棠陰蔽芾蓋先朝有  
蘇公白傳皆從禁苑而出領方州近代則文裕  
文貞亦歷外僚而登庸翰閣詞林猶存故實盛  
事况出同鄉固知申命宅南之咨正爲歸公於  
東之漸干莫會合逾足光牛女之墟故卜思賢

會卽騎尾箕而上某昔依斗下幸陪絳帳之後  
行今託部中更仰油幢之雅化卽昆蟲蟻息猶  
然振蟄於陽春矧燕雀生成能無驩顏於廣廈  
雲霓引領願同騎竹兒童霖露隨車祈憇杖鳩  
父老謹馳心旌而貢鯉容斂手板以登龍嶺聽  
章甫之謠行赴宣麻之召

與洪爾介左轄

燕臺卜夜結想聚星越水行春喜來垂露民還  
得歲西泠再駐襜帷帝寔葵忠兩國重資屏

翰正徽垣之座居然四岳稱尊長列國之藩允  
矣三獨繫望忽聞出綺不覺彈冠况竊鄰光  
時分河潤顧弟自鱗翼之附倚玉懷慚乃兄欣  
臭味之投斷金情篤乘車戴笠跡雖隔於雲泥  
指日盟松心實照於肝膽經年久絕素鯉不責  
踈慵同藉皆附青蠅獨私瞻顧俯念寒氊之寂  
寢曲爲朽木之先容提攜錫之誨音折節而升  
巖蔑警欸假以毛羽逢人每說項斯弟鷁寄一  
枝鼯窮五技歎頭顱之如許鷄肋猶憐嗟髀肉

之已消驥心未老風塵落拓幾隨櫨馬生悲牙  
頰餘波頓令涸魚轉潤不有槐龍之舊侶誰憐  
芻狗之陳人恭惟臺下海嶽人英斗山士望朱  
幡畫戟晉左轄之新增三竺六橋領東方之舊  
伯文武萬邦爲憲暫布化而小屈旬宣精神千  
里折衝行仗鉞而大開戟府幸依燕廈柰隔龍  
門謹拜手以颺言并齋心而布頌惟鮑子少而  
知我無棄菲葑媿燭武壯不如人末酬瓊李歌  
裁章袞且銘日月之常位逼魁台願聽星辰之

履有懷莫吐永矢弗諼

謝蔡參知代

分海邑之符正虞瘞曠綴容臺之屬猥玷恩除似憐鞅掌之勞少佚筋骸之束此大鈞妙播物之巧然小人有乘器之慚竊惟曲禮三千待其人而後舉春官六十非素望則不勝如某者性本棗昏材同樗散營精司牧職惟求牛羊之芻凡骨難仙分不舐鷄犬之鼎五年尸素懇積過於黔黎一旦遭逢忽濫竽於粉省願豈及此得

之駭然伏惟台臺妙有備菁神明衍胄蚤擗珍  
於玄圃繼接武於青霄漢室文章奴使兩京班  
馬虞廷禮樂名高一代夷夔載陟旬宣兼持憲  
節風清鈴閣貢雉之國方來雨度甄山佩牛之  
氓均被翼扶萬品真天地以爲爐器使羣工若  
川藪之藏疾故茲庸謗有幸僥逾柰奉事之未  
幾自違鞭策且起居之乍遠莫效馳驅心醉德  
以難名足遵途而益戀江干鷁首望中越樹偏  
迷郵邸鷄聲夢裡吳雲長繞惟面誨提耳庶幾

惟寅惟清况舊政告新敢忘亦趨亦步有懷啣  
結曷旣編摩

迎李兵使

代

伏審出綺楓宸進司栢憲風清郡閣久懸  
震澤之去思雲擁旌旄忽動婁川之喜色鬱憇  
棠其勿剪紛騎竹以爭迎四履均歡羣僚交慶  
恭惟台臺南州間氣北斗孕精文星暎匡阜以  
陸離家傳學海劍鍔出豐城而閃爍天寶物華  
循良馳譽於花封寅直蜚聲於蘭省一麾出守

三載專城吏仰羔羊疇非則而象者民歌鴻鴈  
幾多卵而翼之福星一路之謳吟生佛萬家之  
香火中和樂職頌滿郊壝襦袴春溫恩流澤國  
方介圭而入覲卽攬轡以治兵主實葵忠暫  
付常袞以觀察民還得歲更煩山甫於城齊蓋  
東南財賦喚區而憲臬備兵阨塞寬則繡衣持  
斧刺舉六條急則樽俎折衝藩屏三輔非壯猶  
才兼文武孰登車志在澄清袞候公歸秩崇  
帝命軍民雷動共欣召父之重來郡邑風馳仍

喜寇君之復借魁台齊色益耀斗牛之墟霖雨  
懷賢卽騎尾箕而上某故依龍光夙陶块北今  
奉烏府更荷照臨人一天我獨二天幸托帡幪  
之庇行百里半九十里尤深覆餗之羞國人如  
望歲乎願言叱馭范叔來何暮矣卽候鳴騶謹  
肅鴈臣僭陳螻素無涯引領曷仍馳誠

奉蔡虛臺觀察

芟憇甘棠見民心於勿剪孫膚赤鳥願公袞以  
無歸載覩去思之同逾彰公論之定矧在末隸

素沐厚幪恭惟台臺履道如弦比德於玉承家  
奎璧鳳毛業紹青箱爲國棟隆雞舌香含粉  
署禮樂播容臺之譽職總夷夔甸握南國之  
衡陝分周召允文允武列藩咸拜其下風宜民  
宜人四境如游於化日鴈鴻中澤不知費幾許  
劬勞野馬塵埃何足爲太空增損皆知美之爲  
美衆乃嫉我之蛾眉無論知與不知誰不白公  
之龍德臥轍攀轅者載路車軛弗前社稷尸祝  
於千秋聲施不朽蓋公之保障有如羊叔之在

峴山而吳之失公不翹嬰兒之戀慈媼一疏皎  
皎益徵余佩之芳萬口昭昭佇見 帝環之錫  
某幸依廣廈况托維桑拙材人謂之樗甘瓠落  
者六載泮宮薄采其藻受蒞植者百千慚負國  
士之知枯朽終淪於溝斷惠微如天之福鶩鳩  
幸決於槍榆何以報生成祇盟肝膽苟堪酬高  
厚敢愛髮膚顧時事危若繁碁深懷婦惄而  
國是紛於築舍誰切杞憂安石其柰蒼生何能  
忘小草中國且相司馬矣行秉大鈞矢在中冊

陳茲副墨

復蔡情符參知

聽雲間之鶴夙皈大冶之鑪鑄坐江右之臯更  
仰文奎之臨照濫附茅茹之拔竊祿南雍實沾  
樹私之恩分光北斗顧瓣香之未展乃華袞之  
遙頒槐溢其肝感深於髓恭惟臺下先天民覺  
爲世儒宗版部望郎朝式黃流圭瓚吳淞良  
守輿頌素瑟冰壺政成南國之棠千秋蔽芾階  
晉外臺之栢一鑑澄清巴聲不變於朱絲郢曲

載廢於白雪民還得歲方歌九歌之鱣鯀 帝  
實葵忠重倚三邦之屏翰羔羊五總自是惠文  
治之熊虎三千其以材武張也之綱之紀法星  
曠牛女之躔不競不絳瑞露溥乾坤之德行開  
戟府暫擁油幢某猥以社樗誤收匠石前推後  
挽不翅泥塗之在埴然右謔左支亡柰族庖婁  
更刀也枯朽終淪於溝斷慚負國士之知鶯鳩  
幸決於捨飛惠徼如天之福一陶厚甚三省瞿  
然矢寤寐以勿諉跂光儀而靡及自揣疏目徒

切凌兢忽拜瓊函益增跼蹐霞蒸五采覺鼎呂  
之猶輕雲燦七襄豈球琳之足重施者未厭受  
也何堪惟辭郤之不恭實汗顏而有覲五中欵  
結藉魚素以陳誠九頓以登介鴈臣而布頌謹  
附澗藻用比野芹藉明信可羞王公難酬金錯  
祈汪度有包荒穢容效珠卿注戀心長編摩筆

短

奉李兵使

依烏府之照臨備員下隸出鴻鈞之冶鑄竊吹

南雍非大造垂檣物之仁則小夫無得與之理  
一陶厚甚三省饗然恭惟台臺爲國棟隆授  
天間氣有花縣之棠在蔽芾千秋惟蘭署之香  
含蕊蕤九畹出守則褰帷露冕霖澍徵於吳歛  
陳臬而攬轡登車霜稜震乎海澨蓋東南財賦  
居甸服半非仁人孰念繭絲且列郡襟喉翼  
天子都藉壯猶繆此戶牖民還得歲再贍膚使  
之車帝實念功竚建中丞之纛暫焉賜履行  
矣宅揆某猥以樗林久塵芹序便便媿乏五經

笥敢云青出於藍歲歲空守一床書或嘲玄之  
尚白雖櫨驥之思未輟柰黔驢之技已窮方虞  
風雨之凌敢惠徼於廈庇幸託陽春之煦過垂  
恤乎氹寒假之羽毛有若前推後挽加之卵翼  
奚翅右挈左提起而决揄枋徒負扶搖之吹息  
采不遺葑菲全歸元化之鑪鑄狗馬餘生何日  
是捐糜之地斗山在望猶未違咫尺之天啞高  
厚恩願快翔千仞之鳳爲東西適更祈加十駕  
之鞭肝膽是盟髮膚豈愛

代蔡觀察復蘇學使

再命專城方慚惕日六條察部誤玷觀風所幸  
依長者之門用是攬慨然之轡曾修辭之不敏  
辱垂問以相先恭惟臺下物望醇儒人倫上詰  
入樸望郎之被粉署含香出分刺史之符黃堂  
奏最旣持斧以貞度旋懸鏡以題才衡鑑當天  
網羅遍地下里折揚之調難溷齊竽中原正始  
之音頓還周雅某枌榆舊社媯姪末交茲托比  
肩更蒙合志惟冒恩有覩方深歎負之憂幸竊

茈知歸倍切登龍之喜勞來還定安集欲濟疲  
氓同寅協恭和衷正資益友蘿附松而益長沐  
入海以增弘柰咫尺之未申乃璫瑶之忽墮劉  
公一紙十州從事奚榮楚水雙魚兩地相思轉  
結敬因來使聊布謝悰秋望念同舟之波母愛  
攻他山之玉

代蔡觀察復各府

專城作牧自揆罔功司臬備兵遽叨持憲冒  
國恩而有覩託衆茈以知歸豈謂菲材濫茲其

事惟是南湖之征榷未獲損鷄似聞渤海之萑  
苻猶憂佩犧欲蘇西江涸鮒難憇中澤哀鴻殊  
窘鼯窮深懷蚤負幸邇公明慈惠之政永絕愁  
恨歎息之聲庶藉蒙咸差堪掩拙千里湖山之  
自得此豈力能兆民田里之相安尚希愛助正  
修辭之未暇忽慶緘之已先袞獎逾涯徒增芒  
背蘧使自遠祇有銘心托雙鯉附尺素願蘄誨  
提馳一騎淖三千卽圖瞻奉

謝蔡太府代

五載勞薪久乏民庸之善狀一朝弛負忽玷曹郎之美除身未游禮樂之司夢弗到寅清之署孰爲之地有隕自天恭惟臺下宇量宏深風猷凝遠宅生千里同雙岐五袴以興歌澤滲百城垂三泖九峯而不朽民懷借寇預懸臥轍之思帝切徵黃佇下賜金之詔如某者塵埃末吏襍線微才初受課於漕輸催科已拙更託身於屬邑撫字徒勞豈謂大造之陶鈞頓使小人而乘器顏之甲矣未知何地以報公德莫大焉所謂

如天之福我功深鑪冶感溢銳罍脫凡骨以漸  
輕獲借天風於鵬翮望光儀之日遠猶依山半  
於龍門一水盈盈寸衷耿耿翹瞻五馬敢忘角  
樂之知敬致雙魚終期豫子之報

謝毛司李

下邑分符久忝芻牧之寄客臺列屬忽及瓜戌  
之期非有清資而致然夫何素望之及此恭惟  
臺不氣溫而栗道直以方化弼畫裳夏日並懸  
冬日祥平肺石福星兼映法星公越樽俎而代

庵人之勞真成屈驥某封府庫以待將軍之至  
獲遂交龜惟是五載盤根應有萬分愆盭非川  
敷善藏其汙疾則憐憫曷免其震凌矧曲禮三  
手必待寅清之選而春官六十詎云邊豆之司  
豈謂孤踪亦塵華貫實假點睛之筆俾嘗換骨  
之丹芽甲根荄固已累洪均之一氣根鬱居樞  
尚希託廣廈之萬間茲身已馳驟周原而神猶  
皈依左右望龍門而搖曳莫罄披襟託魚素以  
陳誠敢忘刻骨

請毛司李交代

代

五載分圭正自媿割鷄之拙一朝解任何幸報  
儀鳳之來和氣先庚而已孚驩聲旁午以交慶  
肅迎千騎敬致雙魚恭惟臺下才刃敏明量波  
澄拓簡孚衆聽三章湔洗以不寃明清單辭一  
念哀矜於所喜可片言以折獨持廷尉之平活  
千人者封行見門閭之大顧屈闌風之步暫試  
花縣之符攬轡志澄清文已知師帥之素下車  
問疾苦諒不勝父母之仁公其惠然至斯民何

修而得此某久於蚊負甚矣鼠窮療曠懷慚考  
每書於下下量移藉花福遂及於容容惟彫瘵  
之餘瘡以勞君子幸陶鈎於大造不棄陳人糠  
粃在前敢曰有告新之政山藪藏疾倘或希議  
故之恩邇風有懷惟日爲歲願言秣馬式復交  
龜察來何暮之謠及瓜而代使推不去之令疾  
策以行曷旣咏思卽祈瞻奉

與陽生白郡公

鳩署舍香邦計夙資於借箸虎符疏寵民庸獲

展於褰帷天開一道福星人慶萬家覆露遙瞻  
千騎敬致雙魚恭惟老公祖臺下高標騫天半  
之霞妙韻絕郢中之雪搏扶搖而上已擊三千  
吞雲夢於胸寧惟八九銅梁製錦澤深巴子之  
鄉金部持衡勇襍望郎之被國家惟積儲大  
命阜此財求天子問錢穀幾何量其入出周  
咨六轡惠遍工商出守一麾位尊岳牧坐拊刺  
桐之郡歡騰騎竹之民情動哀矜每求生於祝  
網心勞撫字豈竭澤於繭絲委蛇芳羔羊五紇

江漢以濯安集乎鴻鴈百堵海國用康霓旌方  
擁於泉南星履卽歸于天上某獲依夏屋如陟  
春臺政屏迎鷕非敢掇綸而錯餌思隨賀燕不  
覺鼓翅以颺言匏繫南雍所忻父母之孔邇葵  
傾北斗願同子弟以飯依用寫寸丹恭隙尺素

復張曙海郡公

一官都講全歸冶鑄之功十部遺書忽拜瓊瑤  
之錫惟明德不遺菲葑故賤走獲霑覆露南雍  
采藻幸依星藻流輝秋風布帆信是慈帆普渡

重憐翮短垂鷗寒某蓋得遇元夫無柰族庖  
已更刀也公更有包荒穢不翅泥塗之在埴然  
海以東乎猶借鄰光於咫尺江之汎矣瞻懷溟  
渤之汪洋矢心弗諉酬德何日

與汪還虛郡丞

隨絳帳於雲間願承鞭弭望襜帷於海上喜式  
旌麾矢明德以勿諥邈流光而靡逮恭惟臺下  
器涵天寶才擅國珠孕靈於白嶽黃山名高桂  
籍育俊於九峯三泖化洽菁莪人文其在茲乎

聲應華亭之鶴唳先生從此升矣兆符璧水之

鱣卿

帝實需賢暫試一麾而分陝民如望歲

遂陪五馬以行春暉茲蒲陽首稱要害裂土踞

泉漳之上枕海依山守相介岳牧之間詰戎固

圉陽侯順軌貢雉之國方來膏雨澍濡佩犧之

夫均被屢歌襦於佐郡借寇方殷行剖竹於專

城徵黃可俟某再叨采藻故自散樗憶聚星於

五茸已數年於此幸繞月於三匝僅百里而遙

况莆係故國子姓焉依以公念舊寅父母孔邇

思日遠而帶日緩自慚疏目於起居舟作楫而  
旱作霖願芷驩顏於屋廈神隨書去情與墨俱  
與殷別駕

含香粉署久挹郎星佐政黃堂暫分風月當清  
朝重外贈刀紛然屈賢者治中題輿偉甚敢布  
編民之敬遙干守相之尊恭惟臺下峻閣承家  
高標照物孕秀於黃山白嶽誇天子郭作求  
有麟角鳳毛聽尚書履少隨日甸業馳譽於爽  
鳩茲借星屏復揚芳於展驥瞻茲石井之都會

允屬清源之隩區地當兩郡之衝人無五兵之  
衛島夷門戶風帆颺發乎不虞寇盜夷庚桴鼓  
時鳴乎半夜非得干城以彈壓孰俾瀚海之安  
瀾惟使君於此不凡岳牧藉保釐之助故聖  
主使來監汲水國資康乂之功郊有祥鸞春臺  
樂只村無冗吠夏屋宴如雖邦人願少借於王  
祥然宣室已深思乎賈誼豈容緹軒久勞州郡  
之間竚歸袞衣重復公侯之始某竊依漢部願  
授膝屢匏繫一榦父母徒懷乎孔邇枝棲三匝

子孫託契之云初萬樹棠陰詎止躬承蔽芾四  
封蔀隱還看戶入帡幪未遂鳬趨祗深燕喜仰  
祈汪度俯鑒微虔

復丁和州

依光梓里追惟京國之綢繆竊吹陪雍喜式歷  
陽之治行何堪投璧自幸側珠恭惟台臺才擅  
國琛器涵天寶家世田何之易夢符固松譜傳  
宓子之琴政游庖刲裁花壯縣清芬夙被於五  
羊剖竹雄州茂績頓高於三輔蓋和爲高皇

湯沐之地妙簡宅生以公爲嶺海慈惠之師宜使司牧民霑露澤不翅鼯鼠飲河吏仰電明有如燃犀照水化成三月已聞章袞之歌聲徹

九重卽下

璽書之召某言采澗藻故自社樗

目瞻斗輝業數年於此身溉波潤僅百里而遙一木盈盈徒切兼葭之想七襄爍爍忽承璠玖之頌思欲報而未能慚彼其之不稱明德遠矣拜以爲榮中心藏之怒焉如擣自分爨餘之棄物曷當格外之隆褒薄有酬瓜仰祈鑒菲

復蘇撫州

某昔聯中表之葭莩幸追隨於京國今采南雍  
之芹藻倍瞻跂乎斗山况曲臺久擅名家而叔  
氏更依年籍柰稽駕乘遂隔龍門仰惟臺下履  
道如弦比德於玉試邑政成馴雉蔀屋皆春郎  
署刑平爽鳩圜扉不夜清貞亡撓母寧與世鑿  
枘聲價逾高自是爲時瑚璉久握蘭於留部旋  
分竹於臨川下車而膏雨澍濡民謳來暮褰帷  
則仁風披拂閣倚橫秋謝康樂山水怡情瞠乎

後矣顏魯公陂田垂利曷以加焉乃鼎翰過示  
謙光而豐幣復隆晉錫明德遠矣難抒報李之  
私中心藏之未卜班荆之日敬爾登謝莫罄頌  
言永矢弗諼有懷莫吐

與劉仲峩明府

飫聞三鳳無路攬輝快覩雙鳧有懷仰止謹修  
虔於短跋特將命於長鬚媿執訊之已稽聊通  
名而告至恭惟臺下西江間氣南楚奇琛文鉢  
映匡阜以高華劍鐸出豐城而閃爍家世弓冶

光分太乙之藜伯仲壇簷枝掇上林之桂宜聯  
班於玉筍抽石渠金櫃之藏乃剖竹於山城稱  
墨綬銅符之長恢恢游刃若爲牛刀之割鷄整  
整華鑣暫借蟻封而試馬河陽花滿寧誇桃李  
成蹊海上春融會見折楊臥草政徵三異懽叶  
一同吏凜神君民歌慈父兩邦奏績從知鳴琴  
不下堂一札旌賢行且衣繡而持斧此日名書  
丹宸看喬鳥蹀蹀雲間他年寵晉黃扉作商霖  
澍濡天下某魚魚未學鹿鹿凡材射策公車遇

已窮於五技穿研冷局志猶勵於三冬惟是掌  
故之科必求知新之選而某自慚殖落深懇食  
浮懲孝先晝眠惟恐嘲師之無筭隨退之晨入  
詎應詰匠以爲楹所敢謁諸生而來前亦恃有  
先覺之在上登龍門以御李喜溢平生託驥乘  
而識韓欣逢一旦曨茲邦之棫樸久被仁風况  
大塊之陶鎔盡霑化雨學行之上言之次敢競  
蟲雕業精於勤荒於嬉尤致螟祝雖不模不範  
或姍笑於門牆而亦步亦趨惟皈依乎山斗情

深嚮往爰託鴻傳念切追陪曷勝燕喜

與俞德化

代

一麾出守擬隨鳬鳥於雲間百里宅生獲寄鷁  
枝於宇下顧平昔瞻依之已久又子孫託庇之  
云初喜動故人光分鄰壁恭惟臺下緣儒飾吏  
學道愛人清操比留犧之風闔澤致棲鸞之化  
才雄無敵一出而凡馬空政妙有神四顧而全  
牛解華亭鶴唳已徹九重之天中牟雉馴乃易  
一同之地施游刃於鷄肋屈逸足於蟻封青山

當縣門不妨柱笏白日了公事儘可鳴琴豈君子仕不擇方姑假小邦以自試抑下邑民凋實甚天其界明府之來蘇從此熟道駕輕何待盤根別利玉磨彌瑩况砥礪於新硎金鑠逾精不櫂剛於百鍊三仕令尹知絕喜愠之心一札寵賢佇俟綸綺之召某舊役吳餉夙飫波餘今受鄰塵更霑河潤素辱投珠之甚侈殊慙報玖之未能憇勿剪之棠猶憶烹鮮而理羈半通之組莫遂騎竹以迎豈敢效陽鱣於扢綸實已切紫

芝於覲宇桑麻無恙彌深孔邇之懷桃李成陰  
終興樂只之頌

代張茂卿候李明府

羽毛驟長於春風幸升司馬桃李久沾於化雨  
慚附登龍覺恩重而身輕柰報深而語淺遙瞻  
函丈倍切負墻恭惟師臺西楚奇琛南州間氣  
試良工於製錦別利器於盤根民仰慈君輿頌  
方騰三異天憐下邑賢聲幸借一同花滿河陽  
琴鳴單父百里之桑麻無恙人游化日之中四

郊之鷄犬不驚野有熙春之樂豈惟青簡獨書  
馴雉之祥佇看綠綿來趣飛鳬之入某親稱邑  
子誼忝門生學殊歉於全牛年已登乎舞象羈  
蹄伏櫪疲駕何意於騰驤戢翮圖南扶搖忽承  
其噓拂忻逢水鑑謬入鑪鑄爰收爨下之桐獲  
脫囊中之穎借風雷之便一躍龍津依山斗之  
光再題鴈塔一寸心捐糜無地莫酬吹萬之恩  
七尺軀卵翼何人永矢在三之義吳雲引領薊  
樹繁思始學割以操刀茫茫畏路願叩洪鍾而

待教奉辟咡於負劍碌碌凡材庶托大冶之陶  
甄薄貢寅丹副在子墨

與韓長洲

一鼈海上幸託聚星雙鳥雲間更沐垂露惟徼  
靈於鑪冶遂刷羽於槍枋顧影懷慚拊心知感  
恭惟臺下高標岳峙神韻淵宏妙簡宅生小試  
初煩製錦榮膺改牧長材故藉盤根風謠問諸  
由拳奠魚龍之國者三載治行高於東海拯鴻  
鷹之勞者百方辟之熟道駕輕一出而羣空凡

馬自是游刃奏驥四顧已目無全牛期月可也  
民多襦袴之歌自天申之 帝亟綸綺之召某  
猥叨世講繁辱夏幙散材人謂之樗宜安濩落  
南雍薄采其藻殊荷栽培况疊承瓊玖之頒屢  
垂恤寒氊之苦思日遠而帶日緩尚懷舊蔭於  
清溪舟作楫而旱作霖竚聽新聲於白苧敬陳  
尺幅用布寸忱率爾投桃仰祈鑒菲

與聶華亭

一鼈海上有幸聚星雙鳥雲間重荷垂露惟微

靈於鑪冶遂刷羽於槍枋省已懷慚拊心知  
恭惟臺下器涵天寶才擅國禎一出而凡馬空  
茂績久馳於三異四顧而全牛解歡聲更叶於  
一同吏仰神君民謳慈父蓋重臨福曜辟之騏  
驥之駕輕徑路熟閑况兩載刃游自是干鎔之  
出匣光芒閃爍暫借牛刀之試播此絃歌用爲  
鴻漸之階遷於槐棘某幸叨世講謬託夏蒙散  
材人謂之樗自甘濩落南雍薄采其藻實藉栽  
培計雌伏而界棲固其所也顧思遠而帶緩末

由從之翹首雲天時聞華亭之鶴唳傾心山斗  
惟跂葉縣之鳬飛中丹是盟副墨曷旣

與姚江都

燕臺倒屣結想聚星海邑分符喜聞垂露最績  
茂騰於三異歡聲普洽於一同恭惟臺下經行  
承家藻猶緯國看花天府聳鴈塔以高題製  
錦江都屈牛刀而小試安鴻鴈於百堵勞來多  
方練羔羊之五紇素絲不染袞衣章甫羣筠  
於揚州題壁書屏治行高於畿輔嘗借鑑根頭

別利庖亦恢恢行下 縱綺以徵賢惠文嶽  
某謬叨世雅獲溉波餘拙材人謂之樗青檀獨  
冷南雍薄采其藻素業未溫秋水兼葭徒寄遐  
悰於鯉尺春風桃李幸沾河潤於龍門敢控大  
鈞敬陳小牘廿四橋夜月願傍鄰光三千界烟  
華竚收春色副在子墨不盡寅冊

賀周開府生第二子

代

陰德高門兆夙占於種玉至仁亢胄瑞更發於  
弄璋華封三祝願多周頌再言稱錫門闡萃祉

闔閭騰歡恭惟台臺傳賚從天申生自嶽允文  
允武國方永藉乎壯猶肯構肯堂天將世胙  
乎明德眷茲徵熊之叶吉居然躍驥以呈祥駒  
惟千里始爲驄試啼聲已知英物雛有一毛便  
是鳳瞻頭角共道可兒三生正釋達之金身九  
世現韋馱之寶相此日銀盆繡褓喜看掌上之  
雙珠他年玉樹琳琅不數堵前之五桂一經垂  
裕百福來同馬維駒馬維騏駢駢齊驤雲路麟  
之趾麟之定振振並耀天衢某徼芷鴻庥欣逢

薰囊符開弓獨願分湯餅之餘甘慶衍箕裘用  
托藻蘋而薦悃有懷頌禱不盡瞻依

壽楊學史代

祝融秉令薰風開咏舜之辰天日誕神瑞日擁  
生申之候絳帳道尊北斗逢衣頌滿南山恭惟  
台臺象應自奎精原是昴都亭雅鎮稜稜帝  
與丹心郡邑巡行嶽嶽人驚鐵面因持神鏡遂  
作士型起代扶衰欲爲歐公之還雅貞文肅度  
不辭師旦之黜浮玉追琢以彌工誰非遠肖金

入冶而弗躍在卽稱良從茲鯢化天池允矣驥  
空澤國維朱明之麗彩赤鳥流大火於天南正  
碧落之呈祥青鳥報長春於海上芹序歡騰桃  
李栢臺慶衍桑蓬當年釋達轉身上界班聯偶  
來仙品此日韋駄現相明時台鉉特借宰官沉  
澀凝禧治域卽爲壽域升恒介福大年奚翅小  
年某覆露如天瞻星惟歲尊開河朔誠慚一石  
之將宴集蓬萊願托三花之獻恭陳潤沚用介  
崗陵首封祝以祈齡式歌且舞喜海籌之添算

俾熾而昌

壽李總漕代

節擁中都萬里功收舞羽祥開南極千秋壽介  
懸弧六幕騰歡一詞贊喜恭惟台臺生自嶽降  
夢叶 帝求昔爲漢殿之星辰今作商家之霖  
雨拊循乎龍蛇赤子民游愛日之中委蛇芳羔  
羊素絲吏畏肅霜之下維茲玄冥之司令正屬  
皇覽之揆初吸沆瀣以凝禧籌添海屋吹葭灰  
而播煖氣轉鴻鈞外理國內理身壽域亘八荒

之表文爲經武爲緯金城奠萬世之安某覆露  
有年瞻星惟歲仰台衡於北斗俾熾而昌頌壽  
豈於南山式歌且舞五百年名世袞烏卽傍雲  
霄八千歲爲春鍾鼎以當鉛汞恭陳潤沚用介  
岡陵倘麾頓於衙官卽崢嶸於末吏

奉按院長至代

重緹候氣肇推三統之元衣繡觀風茂應一陽  
之動龍光有渥燕喜維新恭惟台臺德叶春融  
仁排冬凜抱黃鐘之器韻嶽嶽惠文司丹筆之

簡書稜秩直指周原芭栩久勞六轡之馳驅漢  
節梅花已報一枝之消息趙日可愛復見天地  
之心魯雲必書操凌水霜之肅暫焉鶻鶚行矣  
夔龍獻履徑上於星辰合璧長依於日月某寸  
材線短一障灰寒將歸曝日於茅簷適見回春  
於黍谷維屏維翰仰承覆露之恩俾熾俾昌願  
介岡陵之福拂龜端策驗七日之朋來鳴鳳聽  
箏應九天之詔下恭修魚繭仰祝鴻龐伏翼奏  
涵俯垂霽照

送曹總河年節

代

北斗回杓一氣鴻鈞催暮紀東風應律三春象  
魏布新和霜威岱嶧並高露澤汎汎比潤祥因  
履考亨藉泰通恭惟台臺大德川流陽休山立  
隻手撐將半壁胼胝奏功一腔具有全河平成  
垂德民云得歲福星臨奎婁之墟 帝曰宅揆  
卿月照房心之次維龍驤之旋馭適鳳曆之更  
端華筵酺及同人樽開栢葉絲筆書占大有頌  
擬椒花送寒寧假於土牛坐幹木牛之運歸袞

卽登於金馬行符櫨馬之喧某未解漕冰幸依  
屋廈籥周一甲幾見先春之葦桃盤薦五辛敢  
羞明信之蘋藻天地爲爐陰陽爲炭願噓煖律  
於緹灰巨川作楫大旱作霖共調泰始之玉燭

賀曹總河正旦代

五月初躔星紀復回爲協洽地天交泰雲墟益  
播於孟陬相維玉帳之籌對越璇璣之運百祿  
是總列屬均歡恭惟台臺德配陽休氣排冬凜  
敷土功符神禹載錫玄圭濟川道叶高宗用作

舟楫爲青規而圓萬物輝瑞日於東郊轉洪鈞  
以壽八荒映蒼精於左角漕下冰解三軍挾纊  
於雲屯海宴河清 五位出綸於 天陛吹律  
已溫寒谷遷鶯行應上林三陽拔茅以連茹五  
福竹苞而松茂某久依樾蔭又見桃符無能稱  
栢葉之籜聊數台階蓂葉有懷勒椒花之頌爰  
託驛使梅花惟依所芟之甘棠倘庇無言之苦  
李宏開大冶使無不達之勾萌廣煽仁風幸附  
方春之草木其爲頌祝曷罄颺言

迎蔣大司成公

恭審 中宸渙綸大鈞敷敎簡威重聰明之選  
借材蓬山輒論思俱直之勞造髦璧水化雨行  
霑乎南國春風快覩於上庠恭惟老先生閣下  
爲世儒宗先天民覺儲英中秘蚤超班馬之林  
娛綠南陔時闢求羊之徑 朝望東山之安石  
徒捉鼻云乎 帝思前席之賈生何相見晚也  
春宮勸講案陳折柳之規棘院持衡兼收爲棟  
之用曰 天曰 君曰史權足參三立德立功

立言經堪襲六惟 聖天子華嵩之祝壽考作  
人念 高皇帝豐鎬之都譽髦斯士必朱藍乃  
遷素絲之質宜乎興領鉅儒匪蘭芷孰熏入室  
之馨誰其元長一位 上曰無逾卿者其佩蒼  
玉服朱衣士樂有明師兮願侍馬帷立程雪木  
從繩則直師道立而善人多水障瀾以東六籍  
明而百家廢敬敷崇四術順春秋冬夏之宜綺  
靡變六朝絀月露風雲之習風還正始文在茲  
乎統一聖真吾道南矣某謬叨采藻猥忝維桑

懲孝先晝眠猶恐幽經之無筭隨退之晨入詣  
堪詰匠以爲楹幸瞻數仞之牆冀入一陶之冶  
雖不模不範難免倚席之負慚而亦步亦趨願  
依椽廈而託覆側聞出綺倍切彈冠謹肅魚  
素以馳誠更望鸞扉而引領於覩龍蛇之影增  
杏壇槐市之光恭陳燕雀之忱希撻樸青糞之  
頌有懷負弩卽祈脂車